



## RESOLUCIÓN DO 29 DE XUÑO DE 2018 POLA QUE SE FORMULA A DECLARACIÓN AMBIENTAL ESTRATÉXICA DO PLAN BÁSICO AUTONÓMICO

Promotor e órgano substantivo: Dirección Xeral de Ordenación do Territorio e Urbanismo  
Expediente: 2017AE2075

Código web: 1975/2017

Con base na proposta de resolución do Servizo de Avaliación Ambiental de Plans e Programas, da Subdirección Xeral de Avaliación Ambiental, que a continuación se transcribe:

### ANTECEDENTES

1. A Lei 2/2016, do 10 de febreiro, do solo de Galicia (LSG) introduce entre as súas figuras de planeamento o Plan básico autonómico co fin de dotar aos concellos galegos dun instrumento urbanístico básico que será desenvolto a través dos plans básicos municipais.
2. O día 11.07.2017 recibiuse na Dirección Xeral Calidade Ambiental e Cambio Climático a solicitude de inicio do procedemento de avaliación ambiental estratéxica ordinaria do citado Plan básico autonómico, acompañado do documento inicial estratéxico e do borrador da proposta.
3. O día 17.07.2017 iniciouse un período de consulta pública dos documentos recibidos a través da sede electrónica do órgano ambiental, durante un prazo de dous meses. Ao mesmo tempo consultouse ás administracións públicas afectadas para que realizen os comentarios que estimasen pertinentes.
4. Tomando como base a citada documentación e o resultado das consultas, esta Dirección Xeral formulou o 16.10.2017 o documento de alcance do estudo ambiental estratéxico para avaliación ambiental do Plan, que foi remitido á Dirección Xeral de Territorio e Urbanismo e posto a disposición do público na sede electrónica deste órgano ambiental.
5. O día 14.12.2017 a conselleira de Medio Ambiente e Ordenación do Territorio acorda aprobar inicialmente o Plan e sométese a información pública durante un prazo de dous meses tras a publicación do correspondente anuncio no *Diario Oficial de Galicia* (DOG) núm. 242, do 22.12.2017, nos diarios oficiais provinciais e en diferentes xornais. Así mesmo, leváronse a cabo ás consultas ás administracións afectadas e ás persoas interesadas.
6. O día 22.06.2018 recíbese na Dirección Xeral de Calidade Ambiental e Cambio Climático a documentación completa do Plan co obxecto de que se formule a declaración ambiental estratéxica coa que finaliza o procedemento ordinario da avaliación ambiental estratéxica.

### CONSIDERACIÓNS LEGAIS

1. A Lei 2/2016, do 10 de febreiro, do solo de Galicia (LSG), integra no procedemento de aprobación dos instrumentos de planeamento urbanístico o proceso de avaliación ambiental estratéxica previsto na Lei 21/2013, do 9 de decembro, de avaliación ambiental. A través do Decreto 143/2016, do 22 de setembro, aprobouse o regulamento que desenvolve a citada lei do solo (RLSG).
2. Segundo o artigo 46.1.a) da LSG o Plan básico autonómico debe someterse ao procedemento ordinario de avaliación ambiental estratéxica.

3. O artigo 50.6 da LSG establece que o órgano ambiental, tras realizar a análise técnica do expediente, formulará a declaración ambiental estratégica no prazo de dous meses, contados desde a recepción da documentación completa. Dita declaración ten natureza de informe preceptivo e determinante, e incorporará, en coherencia co artigo 25.2 da Lei 21/2013, as determinacións, medidas ou condicións finais que deberán incorporarse ao Plan que finalmente se aprobe.
4. O Decreto 167/2015, do 13 de novembro, polo que se establece a estrutura orgánica da Consellería de Medio Ambiente e Ordenación do Territorio, atribúe á Secretaría Xeral de Calidade e Avaliación Ambiental as funcións en materia de avaliación dos efectos de determinados Plans e programas no ambiente. A través do Decreto 177/2016, do 15 de decembro, polo que se fixa a estrutura orgánica da Vicepresidencia e das consellerías da Xunta de Galicia, dita secretaría pasa a denominarse Dirección Xeral de Calidade Ambiental e Cambio Climático.

## CONSIDERACIÓN TÉCNICAS

### 1. Obxecto, ámbito e alcance do Plan

O Plan básico autonómico constitúe o instrumento de planeamento urbanístico que ten por **obxecto** delimitar, no territorio da Comunidade Autónoma, as afeccións derivadas da normativa sectorial e identificar os asentamentos de poboación existentes, así como establecer unha regulación de carácter xeral dos diferentes usos do solo e da edificación.

O **ámbito de aplicación** é todo o territorio da Comunidade Autónoma de Galicia.

En virtude do seu carácter subsidiario, as súas **determinacións** serán aplicables con carácter vinculante nos concellos sen planeamento urbanístico, ata que se doten do respectivo plan xeral de ordenación municipal. Terá carácter complementario do planeamento urbanístico municipal naqueles concellos que exista. Así mesmo, terá carácter orientativo na elaboración do planeamento xeral de ordenación municipal.

Pola súa natureza de instrumento de planeamento urbanístico, a súa **vixencia** será indefinida e será executivo tras a súa entrada en vigor.

O seu **contenido** (en coherencia co artigo 95 do RLSG) inclúe os seguintes documentos:

- Memoria xustificativa dos seus fins, obxectivos e determinacións.
- Planos de delimitación dos ámbitos de aplicación dos instrumentos de ordenación do territorio.
- Planos de delimitación das afeccións sectoriais.
- Planos de identificación dos asentamentos de poboación existentes.
- Ordenanzas tipo de edificación e usos do solo.
- Catálogo que recolla todos os bens inmóveis do patrimonio cultural.

En **desenvolvemento** deste Plan redactaranse os plans básicos municipais para os concellos de menos de 5.000 habitantes que carecen de planeamento xeral, na que se atopan 51 concellos. Estes instrumentos delimitarán os núcleos rurais existentes, os terreos que reúnan os requisitos esixidos para seren clasificados como solo urbano consolidado e categorizarán o solo rústico segundo as delimitacións das afeccións establecidas no Plan básico.



## 2. Descripción da proposta

A proposta achegada establece como **obxectivos xerais** do Plan:

- ✓ a conservación e protección dos elementos que conforman o rico patrimonio cultural e natural de Galicia.
- ✓ a integración dos condicionantes paisaxísticos e ambientais.
- ✓ a recuperación das condicións de habitabilidade nos asentamentos.
- ✓ a regulación de usos.
- ✓ a regulación de infraestruturas, espazos libres e comunicacións.
- ✓ a mellora da calidade da urbanización e da construcción.

En coherencia coa LSG, as **determinacións** contidas no Plan inclúen os seguintes aspectos:

- Relación cos instrumentos de ordenación do territorio: incorpora as delimitacións dos diferentes instrumentos de ordenación do territorio aprobados de conformidade coa lexislación de ordenación do territorio de Galicia, de xeito que resulte clara a súa incidencia sobre cada zona do ámbito da Comunidade Autónoma.
- Afeccións derivadas das lexislacións sectoriais sobre o territorio: reflicte os ámbitos de afección que, sobre o territorio, establece a normativa sectorial de aplicación con incidencia no planeamento urbanístico (entre a que se inclúen augas, costas, espazos naturais, montes, portos, aeroportos, ferrocarrís, estradas, enerxía, telecomunicacións, conservación da natureza, paisaxe ou patrimonio). Porén, non clasifica nin categoriza o solo aos efectos urbanísticos. Ditas afeccións sectoriais teñen carácter declarativo, sen eficacia normativa, prevalecendo, en caso de discrepancia, o previsto na correspondente normativa sectorial, estatal ou autonómica.
- Identificación dos asentamentos de poboación existentes: identifica os asentamentos de poboación existentes de conformidade co sistema establecido nas Directrices de ordenación do territorio que servirá de base para a delimitación e categorización dos núcleos rurais e do solo urbano nos plans básicos municipais. Tamén incorpora os asentamentos xa delimitados polos instrumentos de planeamento vixentes.
- Regulación dos usos do solo e da edificación: establece as disposicións xerais sobre os usos do solo e da edificación que resultan de aplicación común ás súas ordenanzas tipo particulares referidas ao solo urbano, equipamentos, infraestruturas, servizos e comunicacións, espazos libres e zonas verdes, e de solo de núcleo rural e solo rústico. Ditas ordenanzas serán incorporadas aos plans básicos municipais en función das características de cada concello e poderán ser usadas de xeito orientativo na elaboración dos plans xerais de ordenación municipal.

## 3. Integración dos resultados da participación pública e das consultas realizadas

Tras a aprobación inicial do Plan este someteuse a **información pública** durante un prazo de 2 meses mediante anuncio nos seguintes medios:

- Diario Oficial de Galicia número 242 do 22/12/2017
- Boletín Oficial da Provincia da Coruña do 04/01/2018
- Boletín Oficial da Provincia de Lugo do 29/12/2017
- Boletín Oficial da Provincia de Ourense do 05/01/2018
- Boletín Oficial da Provincia de Pontevedra do 2/01/2018
- Xornais do 23/12/2017: El Correo Gallego, La Voz de Galicia, El Progreso, La Región, Atlántico, Sociedad, Faro de Vigo, La Opinión e Diario de Pontevedra.

A documentación incluía todos os documentos do expediente, integrando un resumo executivo, o Estudo ambiental estratéxico e un resumo non técnico do estudo ambiental estratéxico. Estivo dispoñible para a súa consulta nas dependencias da Consellería de Medio Ambiente e Ordenación do Territorio e a través dun enlace web para a súa descarga e outro para acceso ao visor coa información cartográfica elaborada, favorecendo a súa consulta pública.

Paralelamente, se realizaron as **consultas** ás administracións públicas afectadas e ás persoas interesadas para que remitiesen as súas consideracións. Solicitouse informe determinante a todos os **concellos** da Comunidade Autonómica e someteuse ao trámite de **audiencia dos sectores directamente afectados**, remitíndose aos seguintes colectivos, entidades e administracións públicas:

- Secretaría xeral Técnica da Consellería de Medio Rural.
- Secretaría Xeral Técnica da Consellería do Mar.
- Secretaría Xeral Técnica da Consellería de Política Social.
- Secretaría Xeral Técnica da Consellería de Cultura, Educación e Ordenación Universitaria.
- Secretaría Xeral Técnica da Consellería de Economía, Emprego e Industria.
- Secretaría Xeral Técnica da Consellería de Infraestruturas e Vivenda.
- Secretaría Xeral Técnica e do Patrimonio da Consellería de Facenda.
- Secretaría Xeral Técnica da Vicepresidencia e Consellería de Presidencia, Administracións Públicas e Xustiza.
- Secretaría Xeral Técnica da Presidencia.
- Secretaría Xeral Técnica da Consellería de Sanidade.
- Axencia de Protección da Legalidade Urbanística.
- Consello da Avogacía Galega.
- Colexio Oficial de Arquitectos de Galicia.
- Colexio Oficial de Aparelladores.
- Colexio Oficial de Enxeñeiros de Camiños, Canais e Portos.
- Consello Galego para a promoción da accesibilidade e a subpresión de barreiras, da Consellería de Política Social.

Así mesmo, realizáronse as **consultas previstas no documento de alcance** do Estudo ambiental estratéxico, nuns casos únicamente se solicitou estritamente a consulta e noutras, dado que o organismo consultado tiña que emitir informe sectorial de conformidade coa normativa sectorial aplicable, solicitouse simultáneamente a consulta ambiental e o informe sectorial preceptivo. Os organismos consultados foron:

- Administrador de Infraestruturas Ferroviarias (ADIF).
- Dirección Xeral de Desenvolvemento Rural.
- Dirección Xeral de Mobilidade.
- Dirección Xeral de Pesca, Agricultura e Innovación Tecnolóxica.
- Axencia para a Modernización Tecnolóxica de Galicia (AMTEGA).
- FEGAMP.
- Federación Ecoloxista Galega.
- Sociedade Galega de Historia Natural.
- Dirección Xeral de Calidade e Cambio Climático.



- Dirección Xeral de Patrimonio Natural.
- Augas de Galicia.
- Instituto de Estudos do Territorio.
- Dirección xeral de Patrimonio Cultural.
- Dirección xeral de Ordenación Forestal.
- Axencia Galega de Infraestruturas.
- Dirección Xeral de Enerxía e Minas.
- Portos de Galicia.
- Dirección xeral de Emerxencias e Interior.
- Deputacións Provinciais da Coruña, Lugo, Ourense e Pontevedra.
- Ministerio de Defensa.
- Ministerio de Fomento.
- Portos do Estado.
- Confederacións Hidrográficas: Miño-Sil, Duero e Cantábrico Occidental.
- Ministerio de Agricultura, Alimentación y Medio Ambiente.
- Ministerio de Educación, Cultura y Deporte.
- Ministerio de Energía, Turismo y Agenda Digital.
- Delegación del Gobierno en Galicia.
- Consellería de Economía, Emprego e Industria.
- Subdirección xeral de Ordenación do Territorio, da Dirección Xeral de Ordenación do Territorio e Urbanismo.
- Consello Galego para a promoción da accesibilidade e a subpresión de barreiras, da Consellería de Política Social.

Respecto aos resultados das consultas recibidas, sinalar que, en xeral, os informes das administracións aluden á normativa de aplicación e remiten as súas observacións e correccións respecto das afeccións sectoriais sobre o territorio reflectidas na cartografía e de aspectos a ter en conta na normativa do Plan. Os concellos pronunciáronse respecto ao listado de asentamentos de poboación identificados no Plan, á correspondencia dos topónimos municipais e outros aspectos, entre os que destaca a inclusión de elementos do patrimonio cultural, revisión dos límites municipais, etc.

Tamén se recibiron observacións de diferentes asociacións culturais, empresariais, veciñais ou de carácter ambiental, de empresas privadas, de colexios profesionais e de particulares. A maior parte destas solicitan completar ou revisar os asentamentos e topónimos, así como os elementos do patrimonio cultural recollidos no Plan. Así mesmo, tamén requiren da consideración doutros espazos fóra do ámbito da Rede Natura 2000, completar a delimitación da rede hidrográfica e doutras infraestruturas (viarias, ferroviarias, enerxéticas, telecomunicacións, etc.), revisar os montes veciñais en man común e os ámbitos de concentración parcelaria, aluden á importancia da recuperación de zonas queimadas ou da substitución de especies exóticas invasoras.

A continuación recóllese un resumo dos principais aspectos sinalados nos informes recibidos:

### *Administración Estatal*

- A Dirección Xeral de Aviación Civil informa favorablemente ao Plan condicionado á incorporación das correccións oportunas en relación aos sistemas xerais aeroportuarios e ás servidumes aeronáuticas.
- ADIF suxire a inclusión dun apartado específico de limitacións á propiedade nas zonas de protección do ferrocarril e engadir un gráfico.
- A Secretaría do Estado do Ministerio de Defensa emite un informe favorable solicitando a consideración das afeccións derivadas das zonas e instalacións de interese para a defensa nacional e a incorporación das instalacións da súa propiedade.
- A Dirección Xeral de Sostenibilidade da Costa e do Mar solicita incorporar algúns cambios na normativa e a incorporación da liña de influencia na cartografía do Plan.
- A Dirección Xeral de Telecomunicacións e Tecnoloxías da Información emite informe favorable en relación á adecuación do Plan á normativa sectorial de telecomunicacións.
- Portos do Estado tras requirir nun primeiro informe a corrección das zonas de servizo portuarias e modificacións en relación coas afeccións coincidentes co dominio público portuario, informa favorablemente coa consideración de corrixir unha serie de erros na cartografía e incorporar un texto aclarativo na normativa sobre as afeccións sectoriais.
- A Dirección Xeral de Estradas do Estado informa favorablemente tras a integración no Plan das observacións realizadas anteriormente en relación á cartografía e a normativa de aplicación.
- A Confederación Hidrográfica do Cantábrico realiza varias observacións a ter en conta no Plan en relación á normativa sectorial.

En canto ao abastecemento, alude a que debería considerarse como condición para o outorgamento da autorización administrativa que comporte necesidade de recursos hídricos que os recursos -da rede pública ou de xestión veciñal- están amparados pola correspondente concesión administrativa do Organismo de cunca, ou, acreditar a existencia de concesión administrativa que ampare a dispoñibilidade xurídica de recursos.

Respecto ao saneamento de aguas pluviais e residuais considera que a regulación prevista no Plan é compatible coa normativa do Plan hidrológico, se ben suxire que se estableza a posibilidade de que as edificacións situadas en solo rústico disponan de sistema autónomo se acreditan a inviabilidade técnica ou económica de conexión a un sistema público de saneamento. Advírtelo que a distancia que se establece nos núcleos rurais entre fosas sépticas e pozos de captación segundo o Plan hidrológico podería ser superior.

En relación á normativa do Plan require da inclusión das limitacións de usos en zona inundable establecidas na legislación ou recoller a obriga de retirar os peches das parcelas respecto a canles de dominio público hidráulico.

- A Dirección Xeral de Política Enerxética e Minas fai referencia á normativa de aplicación, sinala que para a identificación das infraestruturas eléctricas de transporte ou distribución se deberá consultar ás empresas responsables, propón modificar a determinación incluída no Plan sobre o soterramento das instalacións eléctricas en solo urbano, solicita revisar as infraestruturas gasistas e completar o marco legislativo relacionado.
- A Confederación Hidrográfica do Douro emite informe favorable condicionado ao cumprimento dos condicionantes expostos en canto á obriga de solicitar autorización administrativa para a realización de calquera obra que afecte a calquera canle ou a súa zona de pola, advírtelo das



limitacións de usos nas zonas de fluxo preferente e nas zonas inundables a ter en conta na regulación do solo.

Respecto ás instalacións de depuración alude á obrigatoriedade de dispoñer dun sistema adecuado e que calquera desenvolvemento urbanístico deberá garantir o correcto tratamento das augas residuais, remitindo á normativa de aplicación.

En relación á disponibilidade de recursos, sinala que independentemente de que o abastecemento sexa de carácter particular, municipal ou mancomunado, deberá dispoñerse da oportuna concesión de augas para o abastecemento da poboación. Así mesmo, subliña que calquera desenvolvemento urbanístico que implique un incremento do consumo deberá xustificar a disponibilidade de recursos hídricos.

- A Confederación Hidrográfica Miño-Sil sinala que dadas as características do Plan non procede o pronunciamento sobre a existencia de recursos hídricos para satisfacer novas demandas e do posible incremento e destino das aguas residuais.

No tocante aos usos permitidos en terreos de dominio público hidráulico, zonas de servidume e policía, e zonas inundables, informe favorablemente, condicionado á incorporación na cartografía do Plan da rede hidrográfica oficial a escala 1/25.000.

Por outra banda, require da inclusión das reservas naturais fluviais declaradas e sinala que os plans básicos municipais deberán xustificar a existencia de recursos hídricos para satisfacer os incrementos de demanda e o destino dos novos caudais de augas residuais xerados.

#### Administración autonómica

- A Subdirección Xeral de Ordenación do Territorio recolle no informe emitido en relación ao *Plan de ordenación do litoral* que non procede o pronunciamento respecto aos procedementos de adaptación dos ámbitos de desenvolvemento recollidos neste, e que as afeccións derivadas da lexislación sectorial prevalecerán sobre a información reflectida na cartografía do Plan.

Noutro informe pronúnciase en materia de costas. Sinala que a cartografía do Plan inclúe as afeccións derivadas da lexislación sectorial e alude a que corresponde á Administración estatal verificalas. Requer da revisión da normativa referida a actuacións na zona de servidume de protección de costas xa que o seu contido excede do réxime propio desta zona.

- A Dirección Xeral de Emerxencias e Interior solicita incorporar a normativa relacionada coa xestión da contaminación e riscos no marco legal do Plan.
- A Dirección Xeral de Calidade Ambiental e Cambio Climático informa co obxecto de valorar a integración das consideracións do documento de alcance emitido na redacción do Plan, suxirindo a incorporación na normativa de varias observacións. Suxire recoller a necesidade de que os plans básicos municipais analicen a potencialidade e idoneidade do ámbito, especialmente no caso dos solos rústicos, identificar as zonas afectadas por riscos, incorporar os mapas estratégicos de ruído da rede viaria, completar as medidas para evitar a dispersión de especies exóticas de carácter invasor, prever medidas para a posible contaminación acústica debida a actividades económicas e infraestruturas de mobilidade e para reducir a contaminación aústica, así como incorporar a normativa relacionada coa protección da avifauna en liñas eléctricas de alta tensión
- A Dirección Xeral de Mobilidade solicita unha nova redacción na normativa das condicións das terminais de transporte, completar a lexislación sectorial e regular os usos complementarios, compatibles ou alternativos, as condicións de edificacións singulares para o uso de infraestruturas de comunicación.

- A Secretaría Xeral Técnica e do Patrimonio da Consellería de Facenda solicita modificar a normativa en relación aos aparcadoiros nos usos dotacionais.
- A Dirección Xeral de Patrimonio Natural alude á importancia de considerar os instrumentos de planificación e ordenación dos recursos naturais no desenvolvemento do Plan, entre os que destaca o *Plan director da Rede Natura 2000*, que debería figurar entre os instrumentos de ordenación do territorio en lugar das normas sectoriais. Así mesmo, indica que bota en falta unha análise da súa incidencia sobre o citado Plan director, de igual xeito que se analizan para outros plans territoriais ou sectoriais concorrentes.

Solicita incorporar os plans de conservación/recuperación de especies ameazados aprobados, a lexislación referente aos aproveitamentos cinexéticos e piscícolas pola súa interacción co uso público do ordenamento, actualizar os espazos protexidos e corrixir as designacións dalgúns espazos, así como completar os últimos exemplares incorporados ao Catálogo galego de árbores senlleiras. Realiza varias consideracións sobre que os plans básicos municipais deberán ter como principal obxectivo de ordenación a protección dos espazos naturais e espazos forestais, dos hábitats naturais e de interese comunitario, das especies protexidas, ecosistemas fluviais, bosques de ribeira e corredores ecolóxicos.
- Portos de Galicia informa favorablemente tras a inclusión no Plan das consideracións sinaladas respecto á normativa relacionada.
- A Axencia Galega de Infraestruturas (AXI) informa favorablemente se ben solicita incluír no Plan as limitacións ao uso derivadas do ruído ao pé das estradas autonómicas, os criterios de ordenación para a protección do dominio público e o mantemento da seguridade viaria, así como corrixir a zona de afección dalgunhas estradas reflectida nos planos.
- A Dirección Xeral do Patrimonio Cultural informa favorablemente ao Plan condicionado á incorporación dunha serie de medidas. Entre outras, solicita completar a normativa sectorial de referencia, introducir varios aspectos en relación cos Camiños de Santiago, incluír un apartado específico coas determinacións sobre o patrimonio arqueolóxico, revisar os xacementos e outros elementos recollidos no Plan, completar o Catálogo do Plan, incluíndo os bens recollidos no *Plan de ordenación do litoral*. En canto á normativa require facer algunha referencia á necesidade de conservar a rede de camiños, muros de peche, sebes, etc. configuradores da estrutura territorial tradicional ou respecto á regulación dos parámetros de ocupación, edificabilidade ou altura máxima aos atendendo á enorme riqueza e variedade dos núcleos rurais tradicionais galegos. Posteriormente aporta novos bens a incluir no Catálogo.
- A Dirección Xeral de Pesca, Acuicultura e Innovación Tecnológica sinala que deberían analizarse os efectos do Plan sobre a *Estratexia galega de acuicultura* e a planificación prevista nela, completar a normativa sectorial e revisar a denominación dos diferentes establecementos de acuicultura.
- A Dirección Xeral de Ordenación Forestal indica que, en relación ao solo rústico de protección forestal, ante á falta do Catálogo oficial de terreos de alta produtividade forestal o Plan podería considerar os criterios que están elaborando baixo os cales un terreo forestal é de alta produtividade. Tamén aporta información sobre a delimitación dos montes veciñais en man común.
- A Dirección Xeral de Desenvolvemento Rural remite a información disponible en canto á delimitación das concentracións parcelarias. En relación á normativa relativa aos peches, alpendres e edificacións auxiliares considera que o Plan resulta mais estreito que as



*Directrices da paisaxe*, xa que recolle como de obrigado cumprimento varias recomendacións recollidas nestas ou na *Guía de caracterización e integración paisaxística de valados*.

- A Axencia de Turismo de Galicia remiten unhas correccións ao Camiño portugués e de Fisterra-Muxía, comprobados coa Dirección Xeral do Patrimonio Cultural.
- Augas de Galicia emiten informe favorable condicionado a inclusión dalgúns aspectos. Solicita axustar a cartografía da rede fluvial á oficial contida na IDE-DHGC e recoller que no caso de exister mais cursos fluviais será de aplicación a lexislación de aguas. Solicita integrar as zonas protexidas e recoller as prescripcións establecidas na normativa hidráulica.

En canto ao abastecemento incide en que calquera aproveitamento de augas requirirá da súa inscrición no Libro de Rexistro de Augas como uso privativo e que no desenvolvemento dos plans básicos municipais deberase indicar a forma de abastecemento de cada núcleo, indicando se conta con uso privativo inscrito no citado rexistro e remite á consideración das súas instrucións e normativa do *Plan hidrolóxico de Galicia-Costa* no relativo ao dimensionamento das redes. Respecto ao saneamento, sinala que se deberá indicar a forma de saneamento de cada núcleo mediante documentación gráfica e escrita, indicando se conta con autorización de vertido do organismo de cunca. Tamén especificaranse as consideracións recollidas no artigo 37 do Plan hidrolóxico de xeito que as novas áreas que se urbanicen inclúan sistemas de drenaxe sustentable, reducir ao mínimo o selado do solo, etc.

- A Dirección Xeral de Enerxía e Minas fai varias apreciacións á planimetria do Plan en relación á representación dos parques eólicos. Respecto ás infraestruturas eléctricas e redes de gas indica que a documentación do Plan reflicte correctamente a información do Atlas enerxético de Galicia. Posteriormente remite nova información sobre as empresas promotoras de parques eólicos.
- O Instituto de Estudos do Territorio (IET) sinala que non aprecia aspectos no Plan que contraveñan de forma significativa a lexislación sobre paisaxe, nin o contido dos catálogos e directrices que dela derivan. No entanto, realiza unha serie de observacións respecto da normativa.

En relación ás disposicións xerais require emendar as referencias ás *Directrices de paisaxe* e axustarse a estas, establecer que se procure unha adecuada integración das marquesiñas, toldos e rótulos ou soportes de publicidade ou realizar algunas aclaracións aos estudos de paisaxe. Respecto ás ordenanzas de solo urbano industrial-terciario, de equipamentos e de infraestruturas de comunicacións, require do establecemento de medidas para favorecer a integración paisaxística das parcelas e das construcións, de cautelas en canto á implantación de publicidade, establecer límites de ocupación para os sotos e semisotos nos equipamentos ou excepcións para evitar eliminar a desaparición de elementos con valores paisaxísticos no medio rural (valados, cómaros, arboredo, etc) nos camiños rústicos. En relación á ordenanza de solo de núcleo rural común solicita establecer unhas condicións de fondo de edificación orientadas á integración das construcións de forma harmoniosa.

- A Secretaría Xeral Técnica da Consellería de Sanidade solicita modificar a ordenanza de equipamentos para suprimir a obriga de redactar un estudio de detalle e a edificabilidade máxima proposta para as parcelas inseridas en solo urbano intensivo, así como reducir o tamaño de parcela mínima.

#### Administración provincial

- A Deputación da Coruña remite varias consideracións a ter en conta na normativa e cartografía do Plan.

- A Deputación de Pontevedra require da revisión das afeccións sectoriais en materia de estradas provinciais, realizando unha serie de recomendacións.

Como **resultado deste proceso de consultas e de participación pública**, leváronse a cabo unha serie de modificacíons do texto aprobado inicialmente. Principalmente realizáronse cambios na cartografía para integrar todas as observacíons e correccións recibidas, e modificacíons na documentación que responden a cuestíons técnicas ou de índole xurídica e normativa co fin de clarificar ou mellorar a redacción do texto sometido a información pública.

Sinalar que, respecto á normativa do Plan realizouse unha importante labor de simplificación do documento, para facilitar a súa posterior aplicación, dotalo dunha maior seguridade xurídica, eliminando cuestíons que xa se atopan reguladas na normativa sectorial correspondente.

#### **4. Análise da integración dos aspectos ambientais na proposta final**

A avaliación ambiental estratéxica ten por obxecto acadar un elevado nivel de protección do ambiente e promover o desenvolvemento sustentable -na súa tripla dimensión económica, social e ambiental-, mediante a integración dos aspectos ambientais na elaboración de plans e programas.

Tal e como xa foi sinalado, o Plan básico autonómico non establece directamente a ordenación e clasificación do solo, senón que simplemente recopila as diferentes afeccións territoriais que se derivan da diferente normativa sectorial e identifica os asentamentos de poboación galegos. A ordenación e clasificación do solo é unha tarefa que lle corresponde realizar aos plans básicos municipais que se deberán redactar en desenvolvemento deste Plan.

Tendo en conta a documentación achegada, as consideracíons realizadas no documento de alcance emitido e os resultados do proceso de información pública e consultas, a continuación analízanse como se tiveron en conta e se integraron os aspectos ambientais na planificación proposta:

##### Ocupación do territorio

Unha das determinacíons principais do Plan é a identificación dos asentamentos de poboación existentes de acordo co sistema establecido nas *Directrices de ordenación do territorio*, que será a base para a clasificación do solo urbano consolidado e de núcleo rural polos plans básicos municipais.

Neste senso, en aras dunha ocupación racional e sustentable do territorio, o Plan sinala que a **delimitación do solo** que establezan os plans básicos municipais sexa contida e se axuste á realidade do territorio, baseándose no modelo de asentamento poboacional. Dado que estes plans non poderán establecer novos crecementos industriais ou residenciais, non se consideran efectos no consumo do solo significativos.

Respecto á delimitación do solo de núcleo rural tradicional, esíxese que as novas edificacións se encamiñen a consolidar a trama rural preexistente. Para o solo urbano residencial extensivo, incorpóranse recomendacións sobre a posición da edificación co fin de favorecer a compactidade e o aforro de medios. En relación a isto, o Plan incide na necesidade de completar baleiros urbanos e potenciar a rehabilitación, favorecendo a concentración das novas propostas no interior dos núcleos fronte á súa expansión.

Por outra banda, a normativa do Plan incorpora condicións en relación á implantación dos usos industriais para favorecer a separación física doutros usos compatibles, con atención especial na delimitación da zona de bordo entre os distintos tipos de solo, para o que propón unha análise dos bordos perimetrais a prol dunha mellor transición entre zonas urbanizadas e rústicas.



### Patrimonio natural

A cartografía do Plan recolle os **espazos naturais** recoñecidos pola normativa sectorial. Cómpre sinalar que mais do 40% da superficie dos espazos naturais protexidos de Galicia inclúese no ámbito dos 51 concellos que poderán ser obxecto dos plans básicos municipais. Neste sentido, é esencial a consideración das determinacións do Plan director da Rede Natura 2000 e da normativa relacionada co patrimonio natural.

O Plan incorpora varias medidas para favorecer a **conservación do patrimonio natural**. Na normativa alude á importancia da conservación da biodiversidade territorial, recomenda o emprego de especies autóctonas nos peches, subliña a función dos espazos libres e zonas verdes para protección das áreas naturais -especialmente no solo rústico-, promove a eliminación de especies exóticas con carácter invasor e fai referencia ás características dos corredores verdes que se poidan desenvolver.

Así mesmo, require que no deseño dos peches e mobiliario urbano se eviten danos á fauna e á flora e que progresivamente se incorpore arboredo autóctono nas rúas, paseos e parques, seguindo o criterio de rexeneración e recuperación dos espazos de carácter natural.

En relación á **conectividade do territorio**, a memoria do Plan indica a oportunidade de que os espazos adxacentes ás vías rodadas poidan conformarse como pequenas áreas estanciais que configuren unha rede de zonas verdes de alto valor paisaxístico e ambiental. Así mesmo, sinala que o Plan debe facilitar que os instrumentos de ordenación territorial e os plans xerais poidan establecer áreas de conectividade verde.

### Paisaxe

Na cartografía do Plan recóllese tanto os espazos de interese paisaxístico do *Plan de ordenación do litoral* como as áreas de especial interese paisaxístico recollidas no *Catálogo das paisaxes de Galicia*, as cales serán clasificadas polos plans básicos municipais como solo rústico de especial protección paisaxística.

A normativa incorpora medidas para favorecer a calidade e a integración paisaxística dos **núcleos rurais**, así como das súas edificacións auxiliares, peches e infraestruturas. Sinala, ademais, que as edificacións en solo de núcleo rural deberán manter a morfoloxía e a tipoloxía da contorna, axustándose ás características propias da arquitectura tradicional. Como medida para mitigar os efectos estéticos negativos das medianeiras vistas, proponse a utilización de técnicas de xardinería e paisaxismo.

Respecto aos **ámbitos industriais**, alude á importancia de acadar conxuntos homoxéneos e unitarios, evitar o uso de materiais e formas discordantes, así como promover o emprego de pantallas vexetais e arboredo autóctono para minimizar os impactos visuais.

En relación ao **solo rústico**, indícase que as actuacións deberán adaptarse á topografía e aos elementos físicos configuradores da paisaxe.

Mencionar tamén que a memoria do Plan resalta a importancia das intervencións de mellora e adecuación dos **espazos públicos**, así como o especial interese dos pequenos espazos de uso público anexos ao viario existente para a consolidación das perspectivas visuais.

### Patrimonio cultural

O Plan recolle como un dos seus obxectivos xerais a protección dos elementos que conforman o rico patrimonio cultural galego. Incorpora un **Catálogo** que recolle os elementos patrimoniais do Rexistrio de bens de interese cultural e os do Catálogo do patrimonio cultural de Galicia. Neste senso, a memoria indica que, a partir da información facilitada pola Dirección Xeral de Patrimonio Cultural,

incorporáronse aqueles elementos que, non estando incluídos nos supostos anteriores, deben ser protexidos polo seu relevante valor patrimonial.

A normativa do Plan incorpora diferentes criterios para favorecer a conservación e a integración dos elementos do patrimonio cultural. As medidas propostas céntranse especialmente nas ordenanzas de solo de núcleo rural, recollendo disposicións para o mantemento de alíñacións consolidadas, dos muros, sebes e pavimentos tradicionais, así como de edificacións e elementos adxectivos tradicionais. Respecto do solo rústico, alude á importancia de acadar a integración paisaxística das construcións que se sitúen na contorna de bens patrimoniais e do Camiño de Santiago.

Por último, salientar que a normativa indica que os futuros instrumentos que se desenvolvan a partir deste Plan deberán incluir un estudio do patrimonio cultural.

#### Ciclo hídrico

O Plan recolle a rede hidrográfica e a protección de canles contida na normativa sectorial, en coherencia co sinalado polos organismos de cunca.

En relación ao **consumo de recursos hídricos**, a normativa do Plan alude á importancia do fomento de sistemas de aforro e remite á normativa vixente no caso de novas necesidades de recursos.

En canto ao **saneamento**, indica que se fomentará o sistema separativo e recolle os requisitos a cumplir no caso de ampliación, así como a adopción de medidas preventivas da contaminación hídrica por vertidos.

En relación aos **espazos libres e zonas verdes**, promove a súa localización na contorna da rede fluvial, co fin de protexer a marxe e os ecosistemas de ribeira. Alude tamén ao emprego de pavimentacións que permitan a filtración de agua á rede subterránea, especialmente nos espazos libres.

#### Atmosfera, Enerxía e Cambio Climático

A normativa do Plan recolle criterios para a implantación de actividades industriais e propón o fomento dunha rede de mobilidade sostible, tendentes a contribuír á mellora da **calidade do aire**. Así mesmo, se establece a necesidade de considerar a contaminación acústica producida por certas actividades, así como a adopción das medidas correctoras precisas para evitar molestias á poboación circundante. Inclúense tamén esixencias para reducir os impactos lumínicos por mor do alumeadoo público.

O Plan contempla tamén a mellora da **eficiencia enerxética** e á redución da contaminación lumínica nos sistemas de iluminación pública. En relación ás redes de servizo, indica que as actuacións sobre edificacións determinarán o soterrado das redes existentes, e tamén que nos núcleos rurais as novas redes serán soterradas.

En canto ao cambio climático, a memoria do Plan recoñece a necesidade de completar espazos vacantes e recuperar as edificacións existentes a prol da sostibilidade e do compromiso por mitigar as consecuencias do **cambio climático**. Neste sentido, nos instrumentos de derivados do Plan deberán ter en consideración a futura *Estratexia galega fronte ao cambio climático*, que pretende planificar e orientar as actuacións dos diferentes sectores implicados para acadar unha política integradora en relación a este fenómeno global.

#### Mobilidade

A cartografía do Plan recolle a rede de estradas e ferroviaria galega e reflicte as afeccións derivadas da normativa sectorial.



En relación á **mobilidade sostenible**, a normativa do Plan indica que deberá fomentarse o transporte individual non motorizado para percorridos curtos e medios entre núcleos, fai referencia a unha rede de mobilidade sostenible para uso peonil e/ou ciclista e ás condicións para a súa integración no sistema xeral e local viario. Así mesmo, sinala que deberá procurarse a conexión dos espazos libres e zonas verdes mediante sendas peonís e ciclistas.

#### Ciclo de materiais

O Plan recolle que se deberá fomentar a redución na xeración de **residuos**, a reutilización e reciclaxe dos residuos urbanos, facilitando a disponibilidade e o acceso aos colectores de recollida e ás instalacións para o seu tratamento. Respecto aos residuos industriais alúdese a importancia de levar cabo unha correcta xestión dos residuos perigosos que se xeren. Tamén promove o emprego materiais preferiblemente de orixe local.

#### **5. Análise das medidas para o seguimento ambiental**

De conformidade co artigo 51 da Lei 21/2013 o promotor do Plan deberá levar a cabo o seguimento dos efectos no medio derivados do seu desenvolvemento para identificar con prontitude os efectos adversos non previstos e permitir levar a cabo as medidas axeitadas para evitálos.

O EsAE incorpora un programa de vixilancia ambiental que inclúe unha proposta de indicadores sobre diferentes variables que poden dar unha visión global da evolución do territorio galego. Neste sentido, enténdese que a consideración do seguimento ambiental propriamente dito desenvolverase na tramitacións dos plans básicos municipais.

#### **PROPOSTA**

Tendo en conta o sinalado nos apartados anteriores, considérase que o *Plan básico autonómico* é ambientalmente viable e integra os criterios de sustentabilidade establecidos neste dentro do procedemento de avaliación ambiental estratéxica.

Santiago de Compostela, 29 de xuño de 2018

A xefa do Servizo de Avaliación Ambiental  
de Plans e Programas

Margarita Segade Castro

Conforme:

O subdirector xeral de Avaliación Ambiental

José Manuel Tobío Boquete



## RESOLUCIÓN

De conformidade coa proposta anterior, RESOLVO **formular a Declaración ambiental estratéxica favorable do Plan básico autonómico**, en cumprimento da Lei 2/2016, do 10 de febreiro, do solo de Galicia.

Esta resolución farase pública no *Diario Oficial de Galicia* e na páxina web da Consellería de Medio Ambiente e Ordenación do Territorio ([www.cmaot.xunta.gal](http://www.cmaot.xunta.gal)) e remitirase ao órgano competente en urbanismo (Dirección Xeral de Ordenación do Territorio e Urbanismo), para a súa incorporación no Plan.

De acordo co artigo 60.8 da Lei 2/2016, con carácter previo a aprobación do Plan por parte do Consello da Xunta, logo de informe favorable da Comisión Superior de Urbanismo, a Dirección Xeral de Ordenación do territorio deberá elaborar un extracto co contido sinalado no artigo 82 e indicar as medidas adoptadas para o seguimento dos efectos no ambiental da aplicación do Plan.

Contra esta declaración non procederá recurso algúin, sen prexuízo dos que, no seu caso, procedan en vía xudicial fronte á disposición de carácter xeral que aprobe o Plan, ou ben dos que procedan en vía administrativa ou xudicial fronte ao acto da súa aprobación segundo recolle o artigo 25.4 da Lei 21/2013.

Santiago de Compostela, 29 de xuño de 2018

A directora xeral de Calidade Ambiental e Cambio Climático



María Cruz Ferreira Costa